

₹ 4.50

TAWNGTAINAAH

Mizoram Synod Choir te chu Taiwan lam panin an chhuak ta a, kan tawng-tainaa h i hre reng ang u.

-CKTP-

KRISTIAN THALAI


**JULY
2011**



Kristian Thalai Páwl Chanchinbu Thla tin chhuak Vol III No. 5



**Mi maksak
Jona** Page 9



**Kristian Thalai
loh
Mora Reform**
Page 3



**Isua ni se
engtin nge
a tih ang**
Page 14



PRESBYTERIAN CHOIR, LUNGLEI

Page 2

Kristian Thalai Pawl chanchinbu thla tin chhuak

1970-a chhuah tan ■ Kum 41-naa vawi 7-na ■ Chhuah tawh zat : 394

Editor :

Lalmuanpuia

Joint Editors :

R. Lalhmngthanga

Vanlalhruaia

V.L. Muanchhana

T. Upa Lalramdina Ralte

Manager :

Lalnginglova Hauzel

A lak man :

Kum khatah - ₹ 50.00

Copy khat - ₹ 4.50

*Thu chhuah tur nei chuan
Editor, Kristian Thalai, Synod
Office-ah thawn tur a ni a; a la
dah chuan KTP Office-ah a man
pek lawk a ngai.*

Office Phone : 2326372/2335821

Visit us :

kristianthalai@yahoo.com

cktp.blogspot.com

www.facebook.com/centralktp

KRISTIAN THALAI PAWL

Thupui

Rawngbawl tura chhandam

Thupui inngahna

Ephesi 2:10 Thil tha ti atán Krista
Isuaah chuan siama awmin, ama
kutchhuak kan ni si a, chu thil tha tih
chu kan awmna turin Pathianin a
buatsaih lawk a ni.

Thil tumte

1. Isua Krista rinna leh amah anna
kawnga thalaite hruai.
2. Kohhran kut ke ni tura thalaite
buatsaih.
3. Kohhran hnathawh tihpuitlin.
4. Krista Chanchin Tha puan darh.

A CHHUNGA THU AWM

1. Presbyterian Choir, Lunglei	2
2. Kristian Thalai leh Moral Reform	3
3. LIRNGHING : Hun hñuhñung chinchhiahna	6
4. Mi maksak	9
5. KRISTA NEN - Champions League-ah... ..	11
6. Isua nise engtingge a tih ang?	14
7. Kristian Thalaite leh incheina : (Bible thlirna atangin)	16
8. Hruaitu Chanchin	18
9. Bial Conference Report	20

Editorial	1	Hringlang tlâng... ..	20
Rimâwi	22	Hrisêlna	26
Hriatzauna	27	Kantu	29&30
Keimahni	31&32		



ṬANRUAL A PAWIMAWH

Rei lo te emaw kan tih chhûngin kum chanve kan lo hmang ral leh ta reng mai. Kum tîrah khân kumin chhûnga Pathian hruaina kan dawn theih nân kan inkawltîr theuhvin a rinawm a; hei chen min hruaina avàng hian làwmthu i sawi mawlh mawlh ang u.

Kan rawngbàwlna kawng hrang hrang ngaihtuah ta ila. A bîkin KṬP te chuan kumin chhûnga tihhlawhtlin atâna kan tinzâwn (Project) hrang hrangahte engnge kan thlen a, kan tihhlawhtlin tawh? Hruaitute tân - member-te kaihhruainaa hma kan sâwn em? Member-te'n hruaitute kan ṭawiawm ṭha tâwk em tihte hi. A huhova rawngbáwl kan nih avàngin kum khat chhûnga hmalâkna atâna tih tùr, kan hmachhawpahte hian hruaitute kan thlah fál lutuk thei a; chutiang bawkin hruaitute'n member-te kan rinchhan lutuk ve theih bawk avàngin ṭanrual thiam a pawimawh hle a ni. Chutiang tùr chuan inhriatthiamna thui tak nêna thawhhona ṭha kan mamawh hle a ni.

Eng pâwlah pawh awm ila, pâwl tân chuan theihtâwp kan chhuah tùr a ni a, ṭanrual hi chakna a ni tih hi a taka kan kalpui thiam phawt chuan pâwl a chak ngei ang. Kohhranah chauh ni lovin, khawtlângah chhiat tâwk a awmin a ṭanpui tùr leh thlamuan tùrin kan lân khâwm a, a ṭùl ang ang thawkin theihtâwp kan chhuah tlâng ṭhin. Hei hi Mizo nih tinuamtu leh hnam dangte pawhin min awh vèna tak pawh a nih ṭhin kha. Kan kalphung chhuanawm tak hi hlamchhiahin, mi tin hian mahni chauh inngaihtuah tlâng theuh ila chuan, pâwla kan thawhhona chang ni lo, kan ram thleng hian a chhiat phah thei hle ang. Kohhrana kan rawngbàwl honaah pawh hetiang chiah tho hi a ni.

Kohhran/KṬP thil a ni emaw, khawtlâng leh ram thil a ni emaw; lungrual taka thawhhona hian nun a tinuam a, hma min sâwntîr ṭhîn. Khawtlâng siam ṭhatna leh sual do kawngah pawh hian hmahruaitu bîk chu awm ṭhîn mah ila, mipuite kan pawimawh ber mai, mawhphurhna kan nei vek a ni. Ruihhlo do kawngah te, ruihhlo ngaite chhanchhuahna lamah pawh mahni indah ṭha mai lovin kan ṭanrual a ngai hle mai. Kan phákw tâwk theuhah mahni chauh inngaihtuah lovin, midangte tân malsâwmna nih theuh tum ila. Chutiang ni lova, keimahni kan inkalh ṭhem chuan kan intichhe tawn mai dâwn a, hmasâwn a siam ṭhat hna thawk tùra kan mamawh ber chu ṭanrual hi a ni♦

PRESBYTERIAN CHOIR, LUNGLEI



PRESBYTERIAN CHOIR, LUNGLEI hi Chhim lama kan Kohhran rawngbàwlna tichaktu hmanraw pakhat atàn 14th April, 2007 khân khatih hun laia Chhim Bial Administrative Secretary Rev. Lazuithanga hova din a ni a. A tìrah hian Conductor hovin zaipàwl member 20 lekin bul ÷an a ni. A din tìrh 2007-2008 hi term khatah chhiarin kum 2008 a÷ang khân term khat-ah kum hnih dah a ni ta a. Tùna zaipàwl ding mèk hi a term thumna a ni. A din tìrh a÷anga tùn thlengin he zaipàwl hian chhim biala kan Kohhran hrang hrangah rawngbàwlna a ngah hle tawh a, chhim bial chauh ni lovin Synod Inkhâwmpui leh KÏP General Conference-ah te pawh zaia rawngbàwlna an nei ÷hìn a ni. Tin, zaipàwl inenkawlna senso pawh hi Synod budget a÷anga dah hran ve a ni bawk.

Tùn term-a zaipawlte hi 20th April, 2010 a÷ang khân hla te zir chho ÷anin tùn thleng hian vawi 51 hla an zir tawh a, zaia rawngbàwlna vawi 33 zet an nei tawh bawk. Kár tin ninga zàn apiangin Synod House Conference Hall-ah hla an zir ÷hìn a, program neih dàn azirin hun dangah pawh hla an zir bawk ÷hìn. Tin, zaipàwl camp ÷um khat an nei tawh bawk. Tùnah hian conductor telin zaipàwl member 21 an awm mèk a ni. Zaia rawngbàwlna an neih tawhna ÷henkhat te chu –

- * NEICC Youth Assembly, BCM, Lunglei Chanmari
- * Chhim Bial Missionary Retreat, Lawngtlai
- * Chhimtuipui Presbytery KÏP Meet, Saiha (Hetah hian Praise and Worship an kaihruai bawk)
- * 19th PYF Biennial Conference, Chanmari, Aizâwl.
- * Lunglei East Presbytery KÏP Meet, Lunglei Ramthar.
- * Lunglei West Presbytery KÏP Meet, Lunglei Vênglai.

Hêng kan han tàrlan te bákah hian Lungleia kohhran hrang hrangah te, Bible Society program-ah te leh Masihi Sangati-ah te zaia rawngbàwlna an nei tawh bawk a ni. Tin, Lunglei Vênglai Kohhran Silver Jubilee lawmnaah Praise and Worship hun hlawhtling tak an hmanpui bawk. September thla-a Indian Missions Association Inkhâwmpui Hyderabad-a neih tìrah rawngbàwlna nei tura sàwm an ni a, hemi atân hian an inbuatsaih chho leh mèk a ni. Rawngbàwlna hlawhtling tak an neih zêl theih nân i ÷awngtaipui ang u♦

Kristian Ṭhalai leh Moral Reform

(*Johna 12: 13-31; Thufingte 6: 6-11*)

— Rev. K.Lungmuana, Mission Vêngthlang

'Mizo Kristiante mamawh ber chu, Moral Reform hi a ni'

Thuhma: Kum 1958 chho vèl aṭang khân, 'Chhandam nih inhriatna' (Assurance of salvation) hi Mizoramah kan hre lârtan a; hei hian 'Piangthar' tih ṭawngkam a rawn hring lârtan bawk niin a lang. Lal Isua kan rin avànga thih hnua chatuan nun neihna tùr kan inzirtùr uar hle a. Mahse, rilru/moral dik leh ṭha nei thar chho zèl tùr kan nih zia lam hi kan inzirtùr uar tel leh si lo va. Rilru ṭha leh dik pu chuang lo, Kristian kan tam phah ta niin a hriat theih. Chuvàngin, vawi 2/3 lai kan piangthar nawn awn awn mai a nih hi ! Lal Isua rin avànga piangthar kan intih hian, Kristian nun mâwi leh Mizo ze ṭha leh dik kan piantharpui vek lo a ni tih hriat a ṭha hle. Thil tih àwm leh àwm loh te leh thil dik leh dik lo hriat hran theihna (Christian Ethics) nei mah ila, nun ṭha, mâwi leh dik, a taka lanchhuahtùr hi a lo inang hauh lo mai. Dik leh ṭha,

mâwi leh duhawm nunpui tùr chuan, rilru dik (Moral dik) kan neih a ngai ta a ni. Moral ber a dik loh chuan, thil ṭha tak tak sawiin duang ṭeuh ṭhîn mah ila, a takin a lang chhuak thei tak tak dâwn lo tihna a ni. Chuvàngin, kan ram leh khawtlâng nuna kan mamawh ber chu, *'Moral Reform hi a ni e'*. Kan moral hi a reform theih a; a rawn irhchhuahna chu, moral transformed a ni tih erawh kan hriat tel a ngai a ni.

1. Work Ethics neih: Fanghmìr hi tètham hlein lang mahse, Lal Solomona hian an hnathawh dân hmang dik, Work Ethics zir tùrin min ti mauh mai. (Thuf. 6:6-11). "Lal an nei lo, hotu leh hruaitu pawh an nei lo" a ti. Director, Secretary, Superintendent leh Co-Ordinator tihte pawh an nei lo. Mahse an tih tùr ṭeuh chu an hre vek a ni zu tia! Zirtùr hran lo va, mahni inzirtùr (self-directed) an nih hmèl hle. An Work Ethics-ah chuan, Nipui laiin châw an zawng a, Buhseng hunah ei tùr an khâwl khâwm a

ti a ni. Hei hian thawh hun leh chawlh hahdam hun an hriain an nei tihna a ni. Fùrpuì leh thlasik khaw vawh avànga hnathawh th̄at hleih theih loh hun pawhin an khâwl khâwm sa an ei mai a ni. Chhuanhham tih an nei ve lo. Hnathawh tum lék lo va léng huai huai an awm ve lo. Zàn lama Call Centre-a thawkte emaw, chhùn lama thawh rem lo thawk mîte emaw an nih loh chuan, men rei leh zing thawh th̄ai hi intihtùnlai nàn an hmang ve lo a ni. Thawh hunah pawh, 'Mu leh hlek teh ang, chhíng leh hlek teh ang' an ti ve lo niawm tak a ni! Thufing a an vawn tlat niawm tak chu: '*Zàn men rei hian zàn kan bawhchhia a, kan thawh th̄ai hian nî kan hmangsuai*' tih hi a ni. Silchar-ah zing vartianah, Mosolman-hoin, Mike-ah ring fahranin, 'Mosque (Biak in)-ah t̄awngt̄ai, chutiang khatiing hunah neih t̄ur' etc. tia an inkaihtawh ang tho hian, Isua seilenna, Nazareth khuaah pawh chutiang tho chuan, zing 4:30 vèlah an in au tho ve tho mai. Keini Kristian Th̄alaite hian, Aizawl vêng hrang hranga Silchar leh Karimganj Mosolman Pavalai rual hna zawng leh an hnathawh t̄ur inhrilh a an vah sup sup laiin mut kan lo âm ve thungte anih chuan intihsangkanna dikloah kan intihsangkang lek a ni

lâwng mâw? Chaw ei hun dâwn t̄ep a thawh chuan, hmêlhlím pu chung a chaw tui tak ei a harin, Office/mahni hnaa t̄an th̄ai pawh a awl ang; tin, Office/hnathawhnaah pawh taima tak leh Mizo ze th̄a leh Pathian thu ni bawka hnathawh peih a har hle bawk ang. Ka rilru leh mitthlaa awm reng th̄in chu, Christian Conference of Asia (CCA) leh World Council of Churches (WCC) Central Committee huna, khawvêl hmun hrang hrang a t̄anga member Kohhran Th̄alai engemaw zât 'Youth Stewards'(Th̄alai Tirhkah t̄ur) an ruat th̄in hi a ni. An hnathawh t̄ur th̄euh hi an hriain an che smart thei êm êm a. Tih t̄ura an inruat tawh chu a hun takah an ti sung sung tluan chhuak zak th̄in a ni ber mai. Chutiang Work Ethics chu an moral-ah a awm mai ni t̄ur a ni. Hetiang hi keini Mizo Kristian Th̄alaite pawh hian neih a va duhawm êm, Mizo ze mâwi tak a niin a Pathian thu bawk si.

2. Pawisa/Sum zahawmna hriat : Luka 12:15-ah, "Fimkhur ula, duhâmma leh awhna lakah invêng rawh u; mihring nun hi a hausakna/neihnun thilah a innghat lo ve" tih kan hmu a. He Bible thu hian Mizo Th̄alaite, changkân leh hmasâwn tum

takte hi 'Moral ða/dik' nei tùrin min vaukhang hle a ni. Pawisa hi mipui tâna siam leh hman tùra siam a ni a; hman loh chuan awmzia a nei lo bawk. Tin, mi dang hnêna hman tùr a ni. Pawisa bawihah kan awm tùr ni lovin, pawisa hi mihring bawihah a awm zâwk tùr a ni. Hei hi keini Kristian ðhalaite hian kan hriat chian loh chuan, kawng hrang hrang aþangin pawisa hian, '*min lei zâwk mai ang*' tih hlauhawm tak a ni. Professor W.E. Hocking chuan, "Khawtlâng nun zalèn leh nuam nei tùr chuan, pawisaa lei theih loh (unpurchasable) rilru/moral dik kan neih a ngai a ni" a ti. Lal Isuan chutiang mê ni tùrin min ko a ni. Mizoram hi ram zalèn leh nuam taka siam kan duh chuan, pawisaa lei mai mai theih loh mi rilru/moral dik, a lo berah pawh rorél thei chin (Quorum) tling tùr kal khâwm kan neih a ngai tlat a ni.

3. Mahni inneih ni dâr ri hre KÏP : Kum 2010-2011 Report angin, Mission Vêngthlang Bialah chuan, Biak in hawng lo va innei ve ringawt aiin, Biak in hawng ngeia innei, mahni inneih ni dâr ri hria an ðhahnem zâwk, a va làwmawm êm. KÏP member-te hian kan rilru/moral-ah Biak in hawng lo va

inneih hi tihchi loh, Mizo Kristian zia ni hauh lo bawk anih zia i ðhahnhan lul teh ang u. Nupui/pasal neih hnuah kan tu leh fate hnênah, 'Kan KÏP lai chuan' tih hunah inçhîrin bân a chen palh hlauh ang e. Hyderabad Mizo Inkhâwma pa pakhat thu sawi ka rilru khawih deuh mai chu: "*Ka inçhîr êm êm mai chu, ka dam chhûnga ka tâna 'Biak in dâr ri rul rul hre ve hauh lo va nupui ka nei hi a ni, ka thih niah pawh ka tân dâr ri mah se ka hre tawh dâwn si lo*" a ti. Mahni tâna ðha leh Kohhran duh dân ni bawk, KÏP Branch-in chawimawina Certificate a pêk tlâk, 'Biak In hawng ngeia nupui/pasal nei tùr ka ni' tih hi rilru/moral-ah neiin i nunpui ngei teh ang u. Biak in hawng innei tùra nulát tlangvâl nun vawn thianghlim hi a awlai zâwkin a hautak lo zâwk bawk; Biak in hawng lo tùr chi a nulát/tlangvâl nun hman chu a rûk a rála inkawm fo a ngai tlat, hun lah a hekin a hautak fé zâwk bawk sí.'

Pathianin KÏP member, fanghmîr anga taima leh a hun leh hmun hria, pawisaa lei mai mai theih loh leh mahni inneih nî a Biak in dâr ri rul rul hre thei ngei kan nih theih nân mal min sâwm ðheuh rawh se ♦

Lirngîng : HUN HNUHNÛNG CHHINCHHIAHNA

— C. Lalnuntlinga
Salem Br. Aizâw

Lal Isua chuan hun hnuhnûnga thil thleng tûr hetiang hian sawi, "Hnam hrang leh hnam hrang an indo vang a, ram hrang leh ram hrang an indo vang a; lir nasa takin a nghing a nghing ang a, hmun hrang hrangah tamte a tla ang a, hrîte a léng baw ang a; vân aţangin thil hlauhawmte leh chhinchhiahna nasa takte a lo awm ang," (Luka 21:10-11) tiin.

Philadelphia Inquirer chuan October 11, 1995 khân khawvêla lirngîng pun chhoh dân hetiang hian a ziak a: "Magnitude 6.0 leh a aia sâng hi 1950 chhovah khân vawi 9 a thleng a, 1960 bawrah khân vawi 13, 1970 chhovah khân vawi 51, 1980 vêlah khân vawi 100, 1990 chhovah chuan vawi 100 aia tam a thleng a ni," tiin a târlang.

Hrilhlâwktu lâr tak leh lehkhabu 17 lai ziaktu Hal Lindsey chuan a lehkhabu, Apocalypse Code (Palos Verdes, CA: Western Front Ltd., 1997, p. 296) leh Planet Earth 2000 A.D-ah chuan hetiang hian a ziak baw : "Lal Isua lo kal dâwna chhinchhiahna langsâr tak Bible-in a sawi pakhat, Lirngîng chu a pung chho mêk a. Khawvêl hun kal tawh thlir létin hetiang hi a pun chhoh dân chu a ni: Kum 1950 hma lamah

kha chuan kum 10 dan zêlah lirngîng vawi 2 aţanga vawi 4 thleng anga chawhrual theih a ni a, 1950s-ah chuan vawi 9 a thleng a, 1960s-ah chuan vawi 13 a thleng a, 1970s-ah chuan vawi 51, 1980s-ah chuan vawi 86, 1990-1996-ah chuan 150 chuang a thleng a ni," tiin. Anni bákah hian Pathian thu sawitu tam takte pawhin khawvêlah hian lirngîng a pung zêl niin an ngai bawk.

Hetih lai hian zirchiangtu ţhenkhat Steven A. Austin leh Mark L. Strauss (Institute for Creation Research) te chuan 'Earthquakes and the End Times: A Geological and Biblical perspective' tih zirchianna an neiha an hmáwr bàwknaah chuan 'Khawvêla lirngîng pung anga târlan chu thu dik tâwk lo a ni, lirngîng nâ phei chu a tlahniam zâwk' tiin an sawi ve thung. Tin, Lirngîng hi 'Pathian hlauhawmna leh thiltihtheihna târlanna hmanrua' zâwk a ni, an ti bawk. Bible kan en chuan lirngîng hi Pathian ropuina leh a thiltihtheihna lantîrna atân a hmang nasa hle (Sam 68:8, Job. 9:6, Hab. 3:6, Mt. 28:2 etc)."

Hetianga ngaihdân inang lo tak a awm mêk lai hian mak angreng tak chu khawvêla lirngîng avânga thihna thlen tam (record theih chin) top 13 zîngah Kristian ram tia chhal ngam chu ram 3 chiah an awm a, a bák chu Muslim, Hindu leh Communist ram vek an ni tlat!

March 11, 2011-a lirngîng na zet mai, magnitude 9.0 zeta nain a nuai, Japan ramah khian mîhring

maktaduai 127.5 vèl zet an awm a. An sakhaw pui ber chu Shinto a ni a, 84% ațanga 96% te chuan Shinto leh Buddhist sakhua an zui a, Kristian hi zaa pakhat (1%) vèl chauh (maktaduai 2 vèl) an awm a, Hindu, Muslim leh sakhaw tenau tề tề an awm ve bawk.

Kan hriat angin Japan hi ram changkâng, hausa leh khawvèl thila mamawh dang nei tawh chuang lo, mahni induh tâwk tak, fing, fel, ẵnpuitu mamawh lo inti ram ẵn kha Pathian hnathawh an chung a thlen meuh chuan *ẵnpui kan ngai a ni* an ti lawm lawm a. Khawvêla Kristian pâwl hrang hrang te chuan hei hi Chanchin ẵn hrilhna remchângah ngaiin hma an la zui chur chur mai.

Japan thil thleng chungchângah hian khawvêla Kohhran lian ber, Yoido Full Gospel Church, South Korea-a senior pastor Rev. David Yonggi Cho chuan Japan chhiatna chungchâng hi sawiin, "*Pathian vaukhanna*" a ni. *Japan ram hian milem a bia a, Pathian awm ring lo te an tam a, khawvêl thil (materialism)-ah an tlân nasat avângin Pathianin a warning a ni. He chhiatna hi malsawmnaah chang se, Pathian lam hawi phah nan hman se ka duh tak zet a ni,*" tiin a sawi. Japan ram tuarna hi a namai lo hle a, an vanduaina ațanga Lal Isua an lo hriat ve theih nân ẵwngẵpui an ngai hle.

Leilunga chhiatna lo thleng ẵn hi '*Pathian hremna*' a nih loh vèk pawhin '*Pathian Inpuanna*'

hmanrua chu a ni fo ẵn niin a lang. Kan Pathian hi leilunga chhiatna thlengah te hian a inrawlh ẵn ngei ni chuan a lang.

LÌR NASA TAKIN A NGHÌNG A NGHÌNG ANG A...

Khawvêla lirnghing a pun leh pun loh chungchângah inhnialna a awm mêk lai hian Lal Isuan, '... lir nasa takin a nging a nging ang a...' tia a lo sawi hi a dik rêng em? Eng hunah nge kan awm? Kum 20 vèl chhùng leka khawvêla lirnghing na zual, mi sîng chuang thihna thlentu ațang chauh hian fînfiah i han tum teh ang: **September 30, 1993 - India:** India khawthlang lam leh chhim lamah 6.4 a nain lir a nging a, mi 10,000 chuang an thi.

August 17, 1999 - Turkey: 7.4 zeta naa lir a nging avângin mi 17,800 chuang an thi.

January 26, 2001 - India: 7.7 zeta nain Gujarat leh Pakistan a sawi a, mi 19,700 an boral.

December 26, 2003 - Iran: Bam, Iran-a lir nging vângin 30,000 chuang an thi.

December 26, 2004 - Northern Sumatra: Magnitude 9.3 zeta naa tuipui hnuaia lir nging chuan Indian Ocean-ah tsunami rậpthlak tak a siam a, mi 283,000 chuang an thi.

October 8, 2005 - India, Kashmir: 7.6-7.8 zeta nain lir a nging a, 100,000 ațanga 150,000 inkár an thi a, tùn thlenga in leh lo nei zui ta lo tam tak an awm bawk.

May 12, 2008 - Sichuan, China: Mi 69,227 zet thihna thlentu hi a tehnaa

magnitude 7.9 zet a tling. Hliam tuar pawh 300,000. KM 92 huam chhûng building a chhia!

January 12, 2010 - Haiti: Magnitude 7.0 zeta naa lîr a nghin avângin mi 3,000,000 chuangin an tuar a. Haitian sawrkárin a sawi dânin mi 230,000 an thi a, hliam tuar 300,000 awmin, in leh lo chân 1,000,000 an awm bawk.

March 11, 2011 - Japan: Hriat theih chinah Japan rama lîr nghing na ber a ni. Magnitude 9.0 zet a ni. Thi zat hi 10,000 chuang fé an nih rin a ni bawk.

Hêng a chung a kan târlan aţang mai pawh hian Lal Isua thusawi dikzia a lang a, hun hnuhnùng chhinchhiaha a thleng mék a ni tih hi hai rual a ni lo. Khawvêl hian lîrngîng na tak taka la hmachhawn fo dâwn niin a lang.

LÎRNGHÎNG LEH MIZORAM:

Kum 2000 khân Bureau of Indian Standards (BIS) chuan India ram State hrang hrang Lîrngîng hlauhawm dân (seismic hazard map of India) a tichhuak a. India ram hi Zone panga (5)-ah then a ni a. Chûng then zînga hlauhawm ber chu Zone V (Very High Damage Risk), Magnitude 9 aia sâng pawha lîrngîng mai thei zîngah Mizoram hi a tel a ni!

April 14, 2010 khân Zoram Research Foundation buatsaihin I&PR auditorium-ah seminar neih niin, Mizo seismologist, Dr. Lalliana Mualchin (USA) chuan Mizoram chu engtik hunah pawh

lîrngîng na tak thlen theihna hmunah a awm thu sawiin, engtik hunah nge a thlen ang tih leh a lo thleng ngei ngei dâwn em tih erawh hriat a nih loh thu a sawi a. Mizoram chu dinhmun hlauhawm taka ding a nih thu sawiin, inrâlrin reng a ùl thu a sawi bawk.

Tin, ʔawngʔai mî te, Pathian tîrh nia insawi te pawhin Mizoramah chhiatna nasa tak a thleng dâwn a, sima Pathian lam kan hawi loh chuan Pathian hremna kan tuar ngei dâwn a ni tiin an lo sawi fo tawh a. India ram pâwn leh India ram State dang aţang te pawhin chutiang mi chu Mizoramah an lo kal fo tawh nghe nghe.

Kan târlan tawh angin Mizoram hi lîrngîng lamah chuan hmun him lo ber mai zîngah kan tel a. March 24, 2011 pawh khân kan chhak lawk, Myanmar chu magnitude 6.8 zeta nain a sawi a nih kha. Mizoram pawh lîrngîng hian min hnaih hret hret tihna a ni thei em?

Mizoram hi Pathianin min vêng a, min la hum hrih mai niin a lang. Mahse, Pathian hian eng chen nge a zahngaihna kan chungah a lantîr ang? Kan Pathian hi a mîte a duh dâna an awm loh chuan a thîkthu a chhiatzia Israel fate chanchin aţang pawhin kan hriat kha. Pathian duh dâna kan awm lohva, Amah kan hawisan chuan lîrngîng na tak kan tuar ve mai ang tih a hlauhawm hle.

Zoram ʔhalaithe hian kan sualte simin Pathian lam i hawi ang u ♦

Mi maksak

— M.S. Dawngliana,
Puilo Br.

Mi maksak tak zawng a ni ngei ang a chanchin ziahna lehkhabu hi chhiar tûr leh hmuh tûr a vâng ém mai. Bible-ah chauh lo chuan. Chu pa chu Jona hi mawle!

Jona hi mi ropui leh mi maksak tak, a aia thu tlèmte sawia mi tam tak hneh thei hi an vâng viau ang, he khawvêlah hian. Tûnlai khawvêl thiamna sâng chho zêlah miten Audio-Visual aids an tih mai TV, Camera, Internet leh Radio te sermon ropui tak tak te nêna nasa taka an beih pawh in Jona tluka chawplehchilha mi thinlung han hneh nghal mai thei hi an vâng viau ang. Petera'n Penticost Nî a Thlarau Thianghlim hnathawh a zâra mite thinlung a hneha mi tamtak an pianthar pawh khân mi sângthum vèl emaw chauh an ni. Mahse Jona hi chuan, "Tûna china ni sawmli ah Ninevi khawpui hi tih boral a ni dâwn" tih chiah a sawi a. Ninevi khawpuia tungchhova kal zawng zawng an Lalber ho thlengin saïp puan sinin Pathian hmaah an sual simna an puang chhuak ta nghàl chuah chuah a nih kha. Chu mai pawh la duh tâwk lovin an ranrual te nèn lam Pathian zahngaihna

dîlin chaw pawh ei lo leh tui pawh in lovin an lungngaihna leh in chhîrna entirin saïp puan an sin veka nih kha. Heti khawpa thusawi tawi, chuti taka mi thinlung hneh thei si hi Jona tih loh chu tûmah ka la hre lo.

Jona hi Ninevi khawpui ropui leh lian tak nithum kal zeta zau, mihring pawh sângtamtak awmnaa thusawi tûra Pathianin a tîrh a ni a, Pathian tîrhna a hriat phat aţangin Jona makzia chu a lang mai awm e. Amah ngeiin a sawi dân a tuifinriat leh khawmual siamtu Lalpa chu tlân bosan tumin Tarsis khaw têtaktèah tlân bosan a'n tum ringawt te hi a mak leh nîze dang tak chu a ni tih lan tîrtu a ni phawt mai.

Jona makzia a lan chianna dang leh chu thil in tam hleih dân te, in hlut hleih dân te a ngaihtuah thiam lo lutuk te hi! Ninevi mipui tamtak aia Tarsis lawnga chuang mi tlém têt te tàna a nunna a hlàn phal leh tlat mai te hi. Ninevi mipuite tàna inpe phal hauhsilo tlân bona zawng rêng rêng a phílí chuan Lawnga chuang mi tlém têt tàn a inphal leh lawi si te hi ngaihtuahna a neih lohzia ava ti lang lehzual ém!

Jona mi maksak a nihna dang leh chu lungawilohna a hmu sam lutuk te, lehlamah a lăwm ém ém na thilte a têt thamin a bei tham lulai lutuk te kha. Pathianin Ninevi khaw mipuite sualzia a han hmuha anmahni hrem alo tumna

rilru lamlêta a han ngaidam ta khân Jona chu a tilungawilo êm êm leh ringawt a. Kha khân a níkhua lohzia leh mi maksak a nihzia a tárlang Chiang leh zual ngawt mai. “Ka thusawi hria leh zàwmin an sim ta” tih táka ruangin a lungawilo leh thei mai te kha mi maksak tak chu a ni ve rêng rêng mai. A hmuh chák ber zâwk chu Ninevi khua Pathianin ati boral lai kha zu ni tlat a!... Hênga tang te hian Jona chu mi maksak tak chu a ni tih kan hre Chiang leh zual awm e.

A duh anga Ninevi khawpui a han hrem loh tak avànga Pathian chu a nunna làksak tura a han dil leh ta tlat te hi a mak ve rêng rêng a ni.

Pathianin Ninevi khua amíte laka a thinrimna a sût tih a hriat reng tawh hnu a a chhawlbúk sak a tang Ninevi khaw mipuite chhe tûr ala thlír leh ta site hian Jona hi mi maksak tak a nihzia chu a tárlang leh bawka. Pathian vèkin Jona hrehawmna chhawk tura daihlim a siamsak úm a han zàm tír chuan Jona chu a tilawm leh ta êm êm mai tih te han chhiar hian Jona maksakzia a tilang Chiang tual tual a. Ka tân dam aiin thih a tsa zâwk” tia Pathian hnèna thil a dil mék a lu chung a úm a lo zàm tak avànga làwm leh ták te hi mi maksak anihzia ati lang leh thín bawka. A lungnihlohna te, chutih ruala a làwm leh tákna êm êm te hian chhui chian a dawlo lulai lutuk.

Jona chanchina thil lungchhiatthlák ber mai chu thih a chákawl lulai lutuk hi a ni awm e. Amah zàrlim tura Pathianin úm a zàm tír a, túkkhat thil thu maia a han uai leh ta mai avànga Pathian hnènah thih bawka han dil leh mai thei te hi thil dil te hi a awlsam lulai deuh i ti ve lo mâw!! Thil dang a maksak zia chu lo dah tsa ta ila.

Heti kauva mi maksak pawh ni mahse, a lehlamah chuan a ropui leh êm êm lawisi te hi... Isuan khawvêla alo kal chhan leh a chanchin tûr sawina, a bík takin thihna hneha a thawhleh tûr thu a sawinaah te chuan Jona chanchin ber hi a tichiangtu atán zu hmang tlat a! Lal Isua berin a chanchin sawifiahna atána a duh taka a han thur chhuah ngat hi chu pa naimailo tak a ni tih chu sawi ngai lovin kan hre mai awm e. Amah erawh chu hetah ngei pawh hian Jona’n he dinhmun hi amaha a sual chhuah ni hauh lovin Pathianin a fapa thlàn a tang a kaihthawh tûrzia tihlan nán Jona hi Nghapui a dawlh túrin a kawchúng ata a lachhuak leh ta niin a lang.

Heti khawpa mi maksak Jona chanchinah hian engnge kan zir chhuah tûr ni ang áw tiin ka lo ngaihtuah ve thín a. Kan zir theih leh kan zir tûr ni bera lang chu heti khawpa mi maksak pawh Pathianin hmanruaa a hmang duh a nih chuan keini Kristian Thalaite pawh hi min va hmang ve duh nasa dâwn ém♦

KRISTA NEN - Champions League-ah

— Hmingsânga
Chhinga Vêng Br.

Club leh club, football a inelna sâng ber leh hlut hlawh ber UEFA Champions League 2010 -11 chu khelh zawh a lo ni ta a. Kuminah hian kan hriat theuh angin Wimbly Stadium-ah Spanish club F.C. Barcelona leh English club Manchester United ten final an khèl a. Spanish club ropui FC Barcelona chuan an khingpui Manchester United chu 3-1 a hnehin a vawi 4-na atán an champion a. Barcelona thiam zia leh an inkhèl hmuhnawm zia hrih hriat nawn kan ngai lo. Professional Footballer sang tam tak te mangphan chu club hminga an khelhin Champions League a champion nih a ni a, ram aiawha an khelhin World Cup a champion nih a ni ve thung. World Cup leh Champions League-a champion team a tel vè vè tawh nih chu chákawm viau thîn bawk mahse thil har a nih zia chu footballer lâar te hi a hrechiang tute an ni ang. Kumin a champions league final an khelhna Wimbly stadium, chéng \$ 1.97 billion sénga sak

chanchin ringawt pawh ngaihnaawm tham tak ziah tùr a awm laiin; chu lam chu tlânsanin Champions League leh World Cup a champion lallukhum khum kawp thei mi tlêm tè awm zingah Kristian tlangvâl a awm ve a. Rinna lamah kan tualkhat pui, Engkimtithei Pa Pathian ringtu chanchin hi a ngaihnaawm asin.

Taquaritinga chu thing-tláng khua tia sawi mai theih tùr São Paulo state chhûng, hmàr-thlang lam deuh a awm a ni a, chu kuaah chuan mihring nuai-khat tling lo deuh an chéng a. A mi chéng chanve deuh thaw chu Italy, Spain, Portugal leh Japan ram atanga pêm khâwm an ni. Pêm khâwm an nih miau avàngin an khawsak dàn phung pawh an inang lo hlawm viau. In lungualna pakhat an nei, chu chu football ah a ni. Chu kuaah chuan mihring 20,000 len theihna stadium pakhat Estádio Adail N. da Silva an nei a. Kum 1942 a din football club Clube Atlético Taquaritinga an nei bawk a. Sao Paulo state league an khèl ve thîn a. An khaw club a khèl phâk nih chu he khua a football khèl thîn naupang zawng zawng chák ber pakhat a ni.

Inkhelh thiam leh lehkha thiam ni tùra inzirtír aia kut hnathawh uar zâwk tùra infuih sauh sauh thîn loneitu chhúngkaw kára seilian, a

hming José Edmilson Gomes de Moraes tia phuah, Edmilson tia khawvêlin a hriat ták; kut hnathawh aia 'ke hnathawh' thiam leh thei ta záwk chu ni 10 July 1976 khân Taquaritinga khuaah a piang a.

Taquaritinga khaw naupang dang te ang bawkin kawngpui dung leh záwl remchâng laiah football khawvêl zin kawng a rawn zawh chho ve a. A inkhelhpui naupang dang te zíngah a thiam páwl a ni a. An chènna state chhúnga football club ropui ber São Paulo scout te chuan a thiamna leh theihna chu an hmuh hmaih hauh lo. Chu hmun aṅang chuan hnunglam hawi tawh lovin 'tiam chin' lam panin a tlàn zui ta char char a ni.

São Paulo a khelchhûngin a nu leh pa ten Pathian thu an hrilh ṭhîn te chu a hmang ṭangkai ṭhîn hle a. Naupang tè nichungin a hming a chher ṭan a. An khaw naupang tam tak ten an chák êm êm ṭhîn aia sáng záwkah kum 18 a nihin São Paulo football club a zawm thei chu vannei a inti a, Pathian malsàwmna a ni tih amah pawhin a hrechiang a. A nu leh pa ten Bible châng an hrilh ṭhîn 'Kei atán erawh zawng Pathian hnaih hi a ṭha a ni' tih chu a inngahna ber a ni. São Paulo a khelchhûngin São Paulo State ah champion a nihpui bákah CONMEBOL Cup

ah a champion a nih pui bawk.

Inkhelh dawn leh training ṭan hmaa Bible chhiar a, ṭawngtai thlap ṭhîn Edmilson chuan "Khawvêl hian nasa takin min au ṭhîn mahse Lal Isua lo chu duh dang pakhat mah ka nei lo a, khawvêl hi chu a chákna chawp a boral mai tûr a ni a, kumkhaw daih hlimna min pe thei tu awmchhun chu Pathian chauh a ni" a ti.

Kum 2000 khân French club Lyon chuan sum tam tham takin Sao Paulo FC aṅangin an lei chhuak a. Lyon a season khat a khelhin League Cup-ah champion a nihpui nghâl a. Hemi hnu hian Lyon chu a zawnin wawi thum League-ah a champion pui zui ta zèl bawk a. Lyon fans te leh French media te chuan Edmilson leh Juninho te avànga champion ṭhîn niin an sawi a, an fak luih luih a. Chàwimàwina leh fakna za tam tak a dawn pawhin Edmilson chuan "Héng zawng zawng kan tih theih chhan chu talent min petu Pathian vàng a ni a, Pathian ropui ber rawh se " tiin a sawi ṭhîn.

Edmilson chu kum 2004 khân Spanish club hlun leh ropui FC Barcelona chuan €10 million in Lyon aṅangin an lei a. Barca a zawm kum hian La Liga-ah champion a nih pui leh nghâl a. Barca a khelchhûngin hian a vanduai thei hle a. Inhlam vàngin a khel tam hleithei lo.

Kum 2005–06 ah La Liga ah champion a nihpui bákah UEFA Champions League-ah champion a nih pui leh bawka. Champions League-a an champion khán "Ka eizawna kawngah inhliam vângin hun harsa tam tak ka paltlang a, hun khirh leh hrehawm tak a lo thlen cháng pawhin ka lama ƣang chu Lalpa a ni a, Pathian hre lo ni ila, ka hun hman dân kha a hrehawm a, Pathian nèn erawh chuan engkim hi a lo ropui vek mai " tiin amah kawmtu Christian Today hnênah a sawi.

Kum 2002 World Cup-ah Brazil aiawhin a khèl ve a. Champion an la ni zui a. Chumi ƣum chuan Edmilson chuan "World Cup-a champion nih nawm zia leh ropui zia hi ka sawifiah thiam lo a, World Cup khèl phâk nih ringawt pawh a ropui a, team a tel a hlu a, first XI-a khèl phâk nih ngat phei chu inchhuana tham a ni a, champion ni tùra match zawng zawng khèl kim vek nih phei chu sawi ngaihna ka hre lo...chutah kan la champion zui bawk nèn ropui danglam tak a ni. Mahse kháng làwmna leh hlimna te kha chu ropuiin hlu viau bawk mahse Pathianin ka chung a thil tih zozai leh malsâwmna min vûr zawng zawng te nèn khai khin erawh chuan Lalpa ka làwm e tih mai loh chu sawi uar dân ka thiam

lo a. Làwmthu sawi bák hi tihtùr dang tehchiam ka nei lo" a ti. 2006 World Cup ah pawh khân Brazil aiawh tùrin thlan a ni leh a, training an neih laiin a khúp nâ bawk a chhuah leh avângin Brazil team aƣangin a inhnúk-dâwk zui ta a ni.

Brazil tân vawi 40 chuang khèl tawh Edmilson chuan "Khawvêl hian thlamuanna a zawng a, mi tam tak te remna leh muanna zawngin nasa takin an campaign a, an vák kual a, remna leh muanna awm tírtu leh a bul chu Krista a ni tih hi an hre si lo, khawvêl mamawh chhàna chu Isua chauh hi a ni a. Lal Isua lo chu duh tùr dang khawvêlah hian an awm lo" a ti bawk.

Inhliam vâng a hun rei tak a khelhe theih loh hnuah Villarreal chuan an lei ve leh a. Chumi hnuah an ram Brazil ah kír lehin Palmeiras a zawm a. A khúpna avàng bawkin a khèl tam thei lo a, chumi hnuah Spain ah bawkrawn kír lehin season liam ta khán Real Zaragoza ah contract thar a zia ve leh a, beisei phák bákin a che ƣha a, relagation zone a awm Real Zaragoza tán chuan chhanhimtu ti hial a sawi theih tùrin a club tharah a dinhmun a sawh nghet a. Thla nga chhùng lek contract zia kha tùnah chuan kum khat dang Real Zagoraza tân a khèl tùrin an in be fel leh tawh a ni ♦

Isua nise engtinngé a tih ang?

— C. Lalnggheta,
Bâwktlang



Isua nise engtinngé a tih ang? tih hi thu pawimawh tak a ni. Lal Isua zuitu kan ni a, a nun leh a rilru puthmang te, a duhzawng leh duh loh zawng te chu Bible-ah kan hmu vek a, kan thiltih tùr rêng rêng hi *'Isua nise engtinngé a tih ang?'* tih hi kan ngaihtuah reng tùr a ni. Kan nítin nunah hian Isua tih duh tùr nia kan hriatte chauh ti ðhin ila kan nun a hlimin Pathian lawm tlák nun pawh kan nei thei ang a, malsáwmna pawh kan dawng ang. Chutianga kan nun phawt chuan a hnua inchir lehna tùr pawh kan nei tlém ang a, midangte nèna kan inlaichinna pawh a ðha ang a, khawtláng nun nuam leh chhúngkaw nuam kan nei ang a, Kohhran leh KÏP rawngbàwlna thlengin a fuh dáwn a ni.

Kristian ðhalai rualte hian kan thiltihnaah hrang hrangah *Isua nise engtinngé a tih ang* tih hi inzâwt hmasa zél ta ila, ðawngtáina nèna ðangin zawm ngei tum ta bawk ila kan hláwkpuí ngawt ang. Ti thei ta ngat ila chuan KÏP member zu rui leh drugs rui kan awm lovang a, eirúkna lama inhmang

leh mi duham leh chapo te, dáwtsawi hmang leh mi rèl chingte kan awm lovanga, khawlai fa nei leh Biak In páwn lama innei kan tlém ang a, tlin lo chungá Biak In hawnga innei kan tlém bawk ang a, nau tih tlák leh AIDS natna a tlém bawk ang a, rawngbàwlpuite sawichhiat leh iner a bo ang a, kan rawngbàwlna pawh a nung ang a, Pathian lung pawh a awi deuh ngei ang.

Midangte chungá kan rilru put hmang leh kan thiltih tùrah te pawh he thu hi a pawimawh ngawt mai. Mi ðhenkhat an rilru sual hrim hrim váng ni lova, sual hneh loh vánga nawmsip bàwlna lama tlán; a hnu a sualin a vuak lét nun hrehawm tak an awm a. Tin, natna tuar te, ðhenkhat na tuar kher lo pawh sual hliam tuar a, mi hmuhsit leh diriam/endawngna nasa tak tuar a, nun pawh thlahlel tawh lo hial khawpa sualin a bum, a sawisak te pawh hi Lal Isua zuitute chuan hmuhsit ve mai lova khawngaihna, hmangaihna tak tak nèna chhanchhuah dân kawng kan zawn sak te pawh a ðul khawp mai. Mahni mihringpui ðanpui ngaite ngaihsak hman lék lova Kohhran rawngbàwlna leh páwl activities vèla inhman zawh mai hi thil awm thei a ni.

Tùna Mizo mipui tam ber zeizia hi chu Lal Isua hun laia sakhaw hruaitute leh Juda mipuiho ang deuh chauh kha nihna lai kan nei a ni. Khatih lai pawh khán an sakhaw dân te chu ðha takin an zàwm a, mahse,

Pathian ùihna tak tak leh an mihringpuite hmangaihna chu an hlamchhiah tlat. Lal Isua pawh khàn an in enfiah nán suamhmang táwk leh Samari miùha tehkhin thu pawh a sawi phah hial a ni. Keini Mizo mipuite pawh hi kan sakhaw dân, Kohhran serh leh sàng, rawngbàwlna hrang hrang - hnatláng leh Pathian ram thawhlàwm pékte thlengin kan ùha êm êm a, mahse thinlung taka Pathian ùihna leh midangte hmangaihna hi kan hlamchhiah ang tih a hlauhawm tlat a ni. Ùhenawm khawvéng mai bákah laina inhmangaihna ngei pawh a tlahniam sáwt hle. Liberalism aia hnawksak záwk Materialism hian kan kristian nundàn ùha leh kan zonunmáwi leh laina hmangaihna te a ei chhe mék a ni. Khawvéh hmasáwnna kentel hmanraw changkáng chhuak thar apiang neih ve zél duhna/tumna hian eirúkna, duhàwna sual leh mahni hmasialna tenawm tak a keng tel a. Midangte hmákhua thlír lova palzùt hreh lohna leh an chanai pawh hui duhna hial a thlen a, laina leh thisen zawmpui ngei pawh inhmangaih a har tawh a ni. Pathian tel lova inawmtleina, thlarau thianghlim tel theih lohna a nih avàngin nawmsipbàwlna ùha lo, zù leh sà leh sex hman te pawh a hluar a ni. Media lama hmasáwnna pawh a ùha lo zàwnga hman a awl hle. Hèng zawng zawngah pawh hian Isua nise engtinngé a tih ang tih hi a pawimawh hle.

Mizote chu kan pi leh pute hunlai aùanga inhmangaih tawwna ngah tak hnam kan ni a; Kristian kan nih hnuah pawh kan chhawm zèl a, kan Bible zirtùrna pawimawh tak a ni bawk. YMA te lo dingin chawivul zèl a ni a, hun kal zèlah chúng kan hnam ze ùhate chu a lo dal sáwt ta hle a ni. Mi ùhenkhat thlèwna do zawh loh vànga che khawlo te chungá kan thil tih ùhin dante pawh hi a fuh lem lova, Isua nise a tih duh loh tùr hi an lakah kan ti ùhin niin a lang a ni.

A hrechiang ten an sawi dânin kum tin Hospital leh Private Clinic ah te nau ti tla tam táwk fé an awm ziah an ti. Hurna sual tih hnua nunna hlu tak zah zo lova tualthah zui chu huatthlala tak a ni. Hèng bákah hian pawmlai nei reng, a rúka uire pawh engemawzát an awm reng a, langchhuak lo an tam záwk daih an ti bawk. Sawrkár laipui aùanga ram hmasáwnna tùr leh mipui chanvo tùr sum rawn lút mahni tán lo hui a, lo thai bo ùhin pawh tam tak an awm hmèl. Hèng sual nasa záwk ti te zalen taka an nun a, tual an len laia ùhenkhatte sazu ang deuh hial a dan chèp zawng a dik lem lo.

Lal Isua hunlaia uire nu, a uire lai ngei an man, Isua fiah nána a hnèna an rawn hruai, Juda mipui leh sakhaw hruaituten Mosia dân anga lunga denhlum an chák êm êm pawh kha Isua chuan fing takin alo chhanchhuak a, a ngaidam a, ani pawh inhmuchhuakin Isua awm tawh loh hnu thlengin rinawm taka zuitu a ni ta a ni ♦

KRISTIAN ȚHALAITE LEH INCHEINA: (*Bible thlirna ațangin*)

— Pro. Pastor Lalbiakhlira,
Véngnuai, Aizáwl

Inchei hautak Kristian Țhalaite: Mizo Kristiante hi inchei uar tak kan ni awm a sin, hnamdangte hi chuan kan buaipui ang êm êm hian an buaipui lo niin a lang. India ram khawpui ber berah pawh incheina an buaipui vak tlat lo. A awlsam leh zàngkhai apiang an thlang ni maiin a hriat. Mizo kristian Țhalaite incheina hi a hautak ber a ni awm mange a tih theih. A hmei a pa incheina te chu to fer fer tak vek a ni. Kan buaipui ber pawh a máwi leh zahawm lam ai chuan 'Show room a mi a ni em?' 'Branded a ni em?' 'Tunlai fashion a ni em?' tih lamah hian kan buai záwk a ang ta.

Inchei duhtui lo Țhalaite : Kan mawng te, kan lai te, kan kekawrtè te, kan hnutè thlengin lang dáwn mahse mí tihdàn a nih chuan kan inbel hreh tawh lo. Thawmhaw chhuakthar apiang neih tuma buai reng engemawzah kan awm mék bawk a, túnlai uar a

ni em? túnlai style a ni em? tih lamah kan buai lutuk a, a máwi leh zahawm kan ngaihtuah lo fo. Kan sam tihdàn pawh hi incheina a ni ve tho a, 'phungpuinu hairstyle' ni awm tak, phir zum fúk maia kan ti vél te hi chu kan màwipui ngang lo chu a nih hi. Incheinaah kan buai tlang a ni. Hausa leh rethei kan danglam lova, KṚP member leh member lo kan danglam lo fova, Kohhran míte leh khawvél míte kan in ang pút mai!

Bible chuan heti hian a ti : Bible-a kan hmuh dānin incheina hian mihring nun a nghawng thúk thei hle a, nun delh rita lungkham bera neih theih a ni a (Mt. 6:28f). Mí nupa inkár tibuai khawpa inchei theih a ni a, lutuk(over) leh uchuak taka inchei theih a lo ni leh zél (ITim 2:9-10). Chhúngkaw khawsak tibuai khawpin incheina hi úm theih a ni a (Lk 7: 25, 16:19). Khawvél mí nihzia tàrlanna a ni thei a (Mt 6:32), zahpuiawm khawpa inchei theih a ni bawk (ITim 2:9f). Chhúngril màwina leh nungchang Țhatna hliahkhuh Țhak khawpin a inchei theih a (Lk 16:19f), helna leh rinawm lohzia lantirna a ni thei bawk (IPet 3:1,5). Míte mit lák tum leh hamȚhatna beiseia inchei theih a ni leh zél (Mk 12:38; Lk 20: 45f). Bible hian a va hrechiang ém!

Ngaihtuah chiang teh le : I ngaihtuah ngai lo mai thei, I incheina aṭang khán míten tunge I nih an lo teh ṭhîn che a sin. Chuvàngin incheina hi fimkhur a ngai takzet a ni. Fashion-ah I buai em? inngaihtuah chhin teh. Mizo Kristian zínge nupa ṭáng ṭhenna tam tak hi kan incheina nghawng chhuah a ni mai lovang maw? Chhúngkaw khawsak ngaihtuah lék lova incheina kan úm aváng hian kan hriat loh laiin kan chhúngte hi an lo rúm tlawk tlawk mai lo vang mâw? Hlemhletna leh eirukna hluar lutukte pawh hi incheina hautak kan úm vág a ni ve thei ang em? Miten "A fel tehreng nèn; a incheina hi a làwm" an lo ti reng lo vang che mâw? Han ngaihtuah vang vang la, nangmah pawh kha inbihchiang teh.

Engtinngge i inchei ták ang?: I inchei dân tûrah I buai em ni? Midang inchei dân en duh suh. Bible hian kan inchei dân tûr a lo sawi láchk vek

tawh a, kan zui mai tûr a ni dáwn lo'm ni? Kan incheina chu a máwiin a zahawm tûr a ni a, lách thutak hle tûr a ni a, Pathian mí ni awm rênga inchei tûr a ni (I Tim 2:9; IKor 11:2-16), Pathian mithmuha hlu leh a lawm závng a inthum mai tûr a ni a ((Mtt 6:31f; IPet 3:1f), thuamhnaw (fashion)-ah ni lovin Pathianah rinna kan nghat tlat záchk tûr a ni (Lk 123:22,34). Mí nupa inkár tibuai thei incheina lakah kan inthiarfihlim tûr a ni a (I Kor 11:2f), Pathian rinna, thianghlimna leh hmangaihnaa inngat inthumna a ni ngei záchk tûr a ni (ITim 2:15). Mí mit lách tumín kan inthum ve tûr a ni lova (Mk 12:38), páwnlam incheina hian nungchang thianghlim a lantír záchk tûr a ni (IPet 3:2).

Bible zirtírna hi inenfiah nán hmang la, I incheinaah 'tehna diklo thei lo' atán hmang rawh le♦



■ *Napoleon-a kha a hmélma a hnehte chung a rilru put dân a danglam khawp nía. Russia lam a nawrnaah Battle of Borodino an tihah chuan Russia sipaite a hneh a, he indonaah hian a tu lam ve ve pawhin sipai an chán hnem hle. An hneh túkah Napoleon-a chuan indona chu a tlawh a, sipai hliam na tuar tháwm a hriat chuan závwnna kengtute hnénah chuan, "Chu sipai hliam chu la vat rawh u," a ti a. Sipai pakhat chuan, "Ka pu, Russia sipai mai mai a ni," tiin a chháng a. Ani chuan, "Kan hneh tawh hnu chuan hmélma an awm tawh lova, mihring kan buaipui a ngai a nih hi," tiin a chháng a, damlo chu a laktír tho.*

- Today in the Word

Hruaitu CHANCHIN

PU LALROHLUA COMMITTEE MEMBER

Pu Lalrohlua, Pu Apuia tia koh hi Pu Lalzámliana(L) leh Pi Jubili(L) te inkárah kum 1972 June ni 21 khán Sateek khuaah a lo piang a, a pa hi Sipai Compounder niin hmun hran hranah an pém kual thín a ni. Pianpui unau mipa 3 leh hmeichhia 1 a nei a. Kum 2001 October ni 4 khán Upa Chhuanvávra fanu duhlai leh duat ém ém R.Lalmalsàwmi nèn inneiin, fanu pakhat leh fapa pakhat an nei tawh a, tùnah hian an chhúngkuain Saron Véng a an mahni in leh lovah an chèng mék a ni. Pu Apuia hi 5ft leh 7" vèl a sáng kg 85 zet a rit a ni.

Saron Véng Primary school-ah zirna bul tanin Dáwrpui Middle School-ah lút lehin JL High School ațangin kum 1989 khán HSLC a zo a, HSLC a zawh hnu hian Mizoram Polytechnic Lunglei-ah 3yrs Diploma in Electrical Engineer zir lehin, kum 1993 khán zirzoin, kum 1994 May ni 10 ațang khán Transport Department-ah waviin thlengin a thawk zui ta

a ni. Pu Apuia hi zirna ngaisáng mi tak niin Office kal chungin BA a zo leh a, Computer lamah pawh DOEACC hnuaiiah Department tirhin kum 2007 khán O level a passed nghe nghe a ni.

Rawngbàwlna lamah chuan a phákh ang táwka in pe, mawhphurhna hlen ngei tum mi tak a ni. An awmna Kohhranah pawh chanvo hrang hrang Ramthar Committee Secretary leh Fin. Secretary te, Kristian chhúngkaw Committee Secretary te, Bible Society Unit Secretary te, Naupang Sunday school Secretary te, Senior leh Intermediate Department Leader te, Zirtúrtu niin Primary leh Junior department-ah te a lo awm tawh bawk a ni, kumin ațangin puitling lam zirtúrtuah dah a ni. KṚP rawngbàwlna lamah pawh KṚP member rual a nih ațangin a theih ang anga in hmang chhoin kum 1994-1996 chhúng khán Group Leader niin, kum 1997 kum ațang khán tùn thlengin Branch Office bearer niin, OB Post hi Fin. Secretary tih loh chu a chelh kim vek tawh a ni. Branch Leader term pawh kum 6 lai a ni tawh nghe nghe. Dáwrpui Bial KṚP Office Bearer -ah kum 2003 khán lút tanin Treasurer post tih loh chu a chelh kim vek tawh a ni. Tùnah hian Bial Asst. Leader leh Branch Treasurer hna a chelh mék.

Khawtláng rawngbàwlna lamah pawh a theih ang táwk táwk a in hmang mí a ni a, kum 2000 khán Saron Branch YMA Secretary te pawh a lo ni tawh a ni. Service Association lamah pawh Mizoram pum huap Mizoram Technical Service Union (MTSU)-ah Joint Secretary hna a chelh mék bawk a ni.

Pu Apuia hian rawngbàwlna kawnga kan inpe anih rau rau chuan mi inthlahdah a ngaithei lova, harsatna an nei a nih erawh chuan a hriat thiampuin a theih ang táwk a ñanpui duh mì a ni.

Pu Apuia hian amah ang deuh Phìr pui Pu Átea a nei a, biak sual palh an awl hle. A nupui a neih ní leh a fa hmasa ber pian ní chu a hun tawna hlimawm a tih ní ber a ni. Vànneihthlàk takin lungngaih ber ní han sawi mai tùr a nei lo.

Kristian Hla Bu-a hlàte hi ñha a ti in, duh ber thlan tùr a nei lèm lo a ni. Bible chángah erawh Sam 37 pumpui *thil ñha lo ti tute avànga inti lungngai mai lovin*, Pathian lama ñan tlat thu hi a duh ber a ni. A mah biak pawh duh ñan 9862573500 ah dial mai tur a ni e♦



(*Keimahnì chhünzawmna...*) Kum 2011 Lawngtlai Bial KTP Conference vawì 23-nain a lo rel tawh angin, Dt.6-8 April,2011 khán Thingfâl Kohhran Biak Inah Bial KTP Sport Meet neih a ni a, an Bial chhùngah hian Branch paruk an awm a, member zawng zawng hi 250 vèl an ni a, member 120 vèl an kal thei a, Branch hrang hrang a ñangin Member an kal ñha hle a ni. Zirtáwp zàn a ñangin Sermon inkhâwm neih ñan a ni a, a túk inrinni chawhma dár 10:00 a ñanga tlai dar 4:00 thleng sport items chi hrang hranga in elna neih a ni a, Inrinni zàn a ñangin Speaker, Pastor Lalrinfela Pachauau, Bialtu Pastor hnên a ñangin a túk Pathianni zàn thleng Pathian thuchah an ngaithla a ni. Tin, Inkhâwm bàn apiangin fellowship neih a ni a, Pathianni chawhnu inkhâwm bànah mual inkhâwm neiin Bial Leader Pu Lalrintluanga hnên a ñangin Pathian thuchah ngaithlak a ni. Bial Meet-ah hian Branch hrang hrang a ñangin member, inkhâwm ngaihsak lèm lo tepawh an kal nual a, thlarau leh tisaah hlâwk hlein an inhria an inhria a ni.

Thawhñan túkah Thingfâl Kohhran Biak In sakna tùr Balu thiar hnatlâng, Bial huapin an nei nghal a, an thiar zawh ve leh mahni chènna lam ñeuh panin, 2011 Lawngtlai Bial KTP Meet chu an ñiak ta a ni. Lawngtlai Bial KTP hian KTP Day February 22, 2011 khán, Lawngtlai Civil Hospital Blood Bank-ah a mamawh apiangte hman atân thisen unit 26 an pe a, Kum 2008 a ñangin kum tinin KTP Day denchhen hian Blood Donation Camp an la nei thei zèl a, Midangte tâna thisen pe thei túra kaihruaitu Pathian hnênah làwmthu an sawi a ni.

- Bial Conference Report -

January ni 21-23, 2011 chhûnga Bial hrang hrang KṚP Conference-a rorêlte kan rawn tárlang a. Central KṚP thleng tùra rêlte chu rêl fel a ni tawh a, a bák kan hmalákna tùr ðeuhah te hian inṭawngtaipui ila.

Khawzawl Venglai (Member 653)

Khawzawl Vêngsâng Kohhran Biak Inah neiin thupuiah 'Nangni pawhin kalbo in duh vè em''' tih chu Rev. Dr. K. Lallâwmzuala, Lecturer, ATC in a sawi.

Rorelte :

1. 2011-2012 Budget ₹30,500/-.
2. 2011 chhûngin Bial hruaitute leh Bial Zaiþawl ten Bial chhûng Branch tlawhchhuak se.
3. 2011 chhûngin Pastor Quarters tih changtlun nân budget-ah ₹ 10,000/- dah ni se.
4. 2012 Bial KṚP Conference-ah Speaker neih leh ni se.
5. 2012 Bial KṚP Conference-ah Bial KṚP Silver Jubilee lawm ni se.
6. 2011 chhûngin Bial Half Yearly Meet neih ni se.
7. 2012 Bial KṚP Conference-ah Mizoram Synod Choir te chahchhuak tùra hmalák ni se.
8. Kum 2014 KṚP General Conference Khawzawl-a thleng tùrin hmalák ni se.

N.E. Khawdungsei (Member 653)

N.E. Khawdungsei Kohhran

Biak Inah neiin thupuiah chu 'Nitin ei khawp min pe ang che' (Lk. 11:3) niin bial hruaituten an sawi a ni.

Rorelte :

1. 2011-2012 Budget ₹33,485/-.
2. Kum 2012 CKṚP kumpuan atân 'Lal Isue nèn' (Mika 6:8) rawt ni se. CKṚP ah kal zèl se.
3. Bial chhûng Branch tinte solfa-a hma kan sâwn theih nân hma lák ni se.
4. Bial KṚP in Vanlalmuankimi (hnuchham) ṭanpuina pék ni se.
5. Bial KṚP Silver Jubilee Lungphun hi cheiṭhat ni se.
6. Bial huapin Bible chhiar chhuah ni se.
7. Bial KṚP Meet neih ni se, he hunah hian CKṚP hruaitute chah chhuah ni se.
8. Bial huap Advance Krismas Carol Service neih ni se.
9. N.E. Khawdungsei leh Khawkàwn inkâr Chiahpui pêngah Pathian thu ziak tàr ni se.
10. Bial KṚP-hman tùrin Steel Almairah lei ni se.



■ *Ni tin mihring kan hmachhawn zaa 90 hi a thim zâwnga thil thlir ṭhîn mi an ni. Chhang an ken pawhin chhangtlang aain a khem lai kher an hmu ṭhîn a, tui an in pawhin no tlâng bàl lai kher an hmu ṭhîn.*

Hêng mite hnên aṭang hian fakna emaw, nangmah tichak tùra fuihna thu emaw dawn beisei suh. Tùna i dinhmun mèk aia hniam daiha pawhthlák duhtu che an ni.

Chuvàngin hêng mite hi hlau la, an lakah inwêng fimkhur la, i duhtusàm mitthla kha rùkbo tîr hek suh.



HRINGLANG TLÁNG

Vawí khat chu sangha mantu rethei tak hi tuipuíkam daihlímah meizial zu chungá hahdam taka a ðhut laiín mi hausa tak pakhat hi a bulah a rawn kal a, eng vànga sangha man lo va chutianga chàwl der der nge a nih tih a zâwot a; ani sangha mantu lah chuan sangha a man tam tâwk tawh avànga chutianga chàwl chu a ni tiín a lo chhâng mai a.

Sangha mantu chhânná chuan mi hausa chu a tithinrim khatwop mai a, sangha mantu hnênah chuan thinrim zet hian, “Engvàngin nge daihlím hnuaiá ðhu mai mai lova sangha tam zâwk man tuma i beih loh?” a ti khur khur a.

Sangha mantu chuan a meizial chu a han pak khu talh talh a, dam daii hian, “Sangha tam zâwk man ta ila engtin nge ka tih zêl ang?” a lo ti a.

“Aw, sangha i man tam chuan i hausak phah ang a, sangha manna tùrin lawnglian zâwk pawh i lei thei ang chu,”

“Engtin nge ni zêl ang?”

“Tuipuí ðhùk zâwk i liluh thei ang a, sangha lian zâwk leh man man zâwk i man belh thei ang a, i hausa ðhûr ðhûr dâwn aláwm,”

“Engtin nge ni zêl ang?”

“Lawng i neih belh thei ang a, sangha man tùrin midang pawh i ruai thei ang chu,”

“Engtin nge ni zêl ang?”

“Keimah ang maia hausa i lo ni ang chu,”

“Engtin nge ni zêl ang?”

“Hahdam takin i nun i hmang thei ang chu,”

Chutah sangha mantu rethei tak chuan a meizial chu a pak khûk talh talh pah chuan, “I ðhil sawi chu tùnah hian ka chèn mèk a ni làwm ni?” tiín a lo chhâng ta thên a.

Mi ropuí tu emaw chuan, “Ka hausakna ðhurûk chu sum leh pai ka neih tam lam a ni lo va, ðuhzâwng kan nei tlêm zâwkna hi a ni,” tiín a lo sawi daih tazoh rêng a ni.

— Annie Springton

■■■ RIMAWI

Tùnlai music-te hi a him em?

— Rochungnunga
College Veng, Aizawl

80s leh 90s chhoa rock band leh music khân sawisèl a hlawh hle a. Setanic music kan ti a, thusawinaah te kan sawisèl nasa hle ìhîn. Tùnlai music-ah rock music-in hmun a chang lian ta vak lo va, mahse hip-hop, R&B leh rap music ten hmun an chang lian hle. Hêng music hla thute hi sex leh tharum thawhna lam a ni deuh ber a, mahse, hemi piaha thil awm hi ngaihtuahna châng hre lo tam tak kan awm, chúng chu ìhenkhat tàrlan kan tum.

Zaithiamrawn lâar thut-ho hla thu hi i ngaihtla Chiang ngai em? Chu bâkah, tùnlaia zaithiam lâar ber ber kan tihte hla thu hi han ngaihtla Chiang chhin teh, eng nge i hmuh le? Hla ìhenkhat kan han tàrlan te hi enchiang chhin teh le:

Jamie Foxx - Rain Man

'Release me, ohh uhh ohhh ohhh uhh ohhh Rain Man...'

The Game - Cali Sunshine

'With more ass then delicious, that's my flavour or love. We made it rain like Rain Man...'

Jay-Z feat. Usher & Pharrell - Anything

'...come and get this cash from me. They call me Rain Man'

Nas - Don't body ya self

'I love the Rain Man, I love the rain'

Jay-Z - Devil's

'Illuminati want my mind, soul and my body...'

Tupac - They don't give a fuck about us

'Some say they expect Illuminati take my body to sleep'

Khîngte khi hla tam tak zînga tlem tê chauh an ni. Hêng hla thua thil inang kan hmuh langsar tak chu 'Rain Man' leh 'Illuminati' a ni. Hêngte hi eng nge an nih kan en zui ang.

RAIN MAN

A ãawng bul aãanga chhui a ngai hran lo. Rain chu naupang pawhin ruah a ni tih an hre thei ang, chutiang bawkin Man pawh. Rain Man chu Ruah Mi tihna mai a ni; chu chuan eng nge awmze ril a neih le?

Bible-ah chuan 'Lalpa malsawm ram' a tih chuan ruahtui dawng ãha ram a sawina a ni. Rain tih hrim hrim hi a hmanna hrang hrang a awm a, thil tam tham tak pe/vur tihna te pawh a ni bawk. Tùnlai zaithiam leh hla phuachtuten an hmanna pawh hi chutiang deuh bawk chu a ni.

Rain Man tih lanna hla hrang hrang aãanga kan hmuh chu Rain Man chu malsawmna, sum leh paia mihringte vur a, lârna leh mipat hmeichhiatnaa an mamawh petu angin a ni. Eminem-an 'My name is Rain Man' a tih leh, Ozzy Osbourne-an, 'My name is Lucifer' a tih chu thil thuhmun a ni. Setana chu he khawvêl thim chung a rorêltu a ni a, hausakna, lârna te

mihring chungah, ama hnêna inpète hnênah a pe thîn a, chuvàngin music industry chuan a hmingah Rain Man tiin an sawi ta a ni. Zaithiam tam tak chuan an thlarau hi ramhuai hnêna an hlan thu an sawi thîn a ni (eg. Kanye West, Katy Pery, Jay-Z, Eminem ldt).

ILLUMINATI

Hla thenkhat kan târlanah khian 'Illuminati' tih kan hmu ang. 'Angels and Demons' film-ah khân Illuminati kan hmu baw. Illuminati hi mi tam tak chuan film leh thil danga hman atâna an phuahchawp niin an ngai a. Mahse, thawnthu satliah a ni lo, nise, Tupac te hian a sa a sa lo ang.

Illuminati sawi chiang tùr chuan kum zabi 18-na laiah kîr a ngai. Bavaria (tûnlaia Germany ram) ah Adam Weishaupt a awm thîn a. Weishaupt hian kum 1776 May 1 khân Illuminati pâwl hi a din a. He pâwlah hian hetih hunlaia vântlângin an pawm leh ngaih ang pawm lotu, (inti) ril tak tak an tel a ni. Kum 1777-a Karl Theodor-a Bavaria lal a nih khân Illuminati hi a duh lo nghâl hle a. Kum 1784 khân Illuminati pawh chu tih tâwp thu a pe ta a ni. A kum leh, 1785 March 2 chuan Bavaria-a Illuminati tawh phawt chu man theihna thupêk a chhuak a, Weishaupt chu a tlânchia a, a lehkha pawimawh tak tak erawh man a ni thung.

Hemi hnu hian Illuminati hi a rûkin a la ding zêl a, French Revolution-ah pawh khân a

meizanghlaptu berah an la țang niin an sawi thîn. Hemi hnu hian a zuihral ta niin mi thenkhatin an ngai a. Thuziak mi Mark Dice te, David Icke leh mi dang dangte chuan a rûkin a la ding chho zêl niin an ngai thung. Illuminati zirchiangtu Wes Penre chuan tùn thlengin a rûkin a la ding niin a sawi a, thil ti thei tak niin a ngai baw.

Wes Penre-a paper 'The Secret Order of the Illuminati: A Brief History of the Shadow Government' pawh a ngaihna hle. Hetah hian, thim thuneihna nê n țangrualin, a rûkin khawvêl ei leh bàr, politics leh sum leh pai an thunun a, media pawh hi an hmanraw țangkai ber a ni. An duhzâwng apiang an ti lâr a, an duh loh zâwng chu nasa takin an tihmingchhe baw. Penre hian Illuminati-a thuneitu ber (bloodline) chu tùnlai khawvêla chhûngkaw hausa ber ber 13 an niin a sawi a, an tum ber chu khawvêl pum rorêlna pakhat hnuai dah (one world order) a, an duh duha chin leh kual a ni. He an thil tum hi a rûkin mipuite thinlunga tuh tùrin zaithiam rual an hmang a. Hêng zaithiamte hian an hla thu hmangin mipui rilru hi an hneh mêk a ni.

Anmahni leh an thil tumte hi tùnah langsar takin an târlang nghâl lo va, sign leh symbol hmangin an tilang chauh rih a. An sign leh symbol hman langsar te chu - all seeing eye, devil's horn (Baphomet horn), pentagram te an ni. Ziaktu thenkhat chuan

Illuminati te hian black magic an uar a, Setana thiltihtheihna nêan an kawp tlat niin an ziak. An hmanrua atâna inpe tawh, an pâwl chhuahsan emaw, langsàr taka puangzàrtute chu òim hauh lovin an that mai a ni (eg. Tupac Shakur. Tùnhnaiah Lindsay Lohan chuan Freemason miin thah a tum niin a sawi. Freemason hi Illuminati hnuaia order/pâwl pakhat an ni).

RIHANNA 'UMBRELLA' KHA

'Rain Man' chungchâng sawi lan tawh hla sawi hlawh ber pâwl chu Rihanna rawn làr chhuahna hla 'Umbrella' kha a ni. He hla hi kum 2007-a rawn làr òan a ni a, hei hi Depression (sum leh paia khawvêlin harsatna a tawh) hma a ni a; kum 2009 aòang khân khawvêl chuan sum leh paia harsatna nasa tak a tâwk a ni. He harsatna hi Rihanna Umbrella-ah hian a lo lang daih tawh a, chuvàng chuan mi òhenkhat chuan Depression kha Illuminati ten an thlentùr niin an ngai.

'Umbrella' kha uluk vaklova ngaihthlâk chuan nula leh tlangvâl inhmangaihna thu mai niin a lang a. Mahse, bihchian erawh chuan a ni hauh lo thung. Jay-Z rawn rap-na lai kha-

No clouds in my storm

Let it rain, I hydroplane in the bank

Coming down with the Dow Jones

When the clouds come, we gone, we Rocafella

Helaia 'storms' hi sum leh pai sawina a ni a, 'coming down with the Dow Jones' hi sum leh paia tlâkchhiatna sawina a ni. 'Dow

Jones' hi stock market sawina a ni. Sum leh paia harsatna lo thleng mah se, a khawih buai phak lohah (fly higher than weather) an awm dâwn tihna a ni. Rocafella hi Jay-Z record label a ni a, John D. Rockefeller sawina a ni bawk. Rockefeller-a hi kum 1929-a Great Depression thlentùrtu niin mi òhenkhat chuan an sawi. Illuminati-a Satanic bloodline chhûngkaw 13 zînga pakhat niin an sawi bawk.


Jay, Rain Man i back with little Ms. Sunshine

Rihanna, where you at?

Hetah hian Jay-Z chu Rain Man aiawhtu (Devil) a ni a, Rihanna chu 'little Ms. Sunshine' a ni. Jay-Z chuan Rihanna chu amah zawm tùrin a sâwm a ni.

Rihanna rawn sak - *'You have my heart...And that's when you need me there with you I'll always share'* thla kha, Setana'n (Rain Man) Rihanna chu khawvêl hausakna leh làrna hmanga a thlêmna a ni. A thunawn lehinna an siam dân hi thlír ve rêng rêng teh ang:

'When you shine from your success, we both profit from it



*I will always be part of you
I will always be on your side
I promised you, I would protect you
and i I will do it as long as necessary
Now the financial crisis is afflicting
the world
But I'm still here with you
You can be under my protection
You can be under my protection*

He video hrim hrim pawh hian sawi a hlawh. Metallic colour fluid, Rihanna'n a theh per chuai chuaiah khân, uluk taka en chuan Baphomet lú hmuh tùr a awm a. Triangle chhûnga Rihanna a awm zawkah khân Rain Man (baphomet) hmêl tih lan a ni. (Baphomet hi Satanic cult-ah chuan Setana sawina a ni a. Alem an tihlan thinah chuan kèl pa, ki sei tak nei, a taksa mihring, a ke lam kèl ang bawka tihlan a ni thîn).

UMBRELLA

Rihanna chauh a ni lo, 'Umbrella..ella..eh..eh' tih hi hla dang tam takah hmuh tùr a awm. 'Got Money' hla, Lil Wayne feat. T-Pain-ah pawh 'Everybody say Mr. Rain Man, can we have a rainy day? Bring an umbrella please bring an umbrella ella ella ella ehh' tih a awm bawk.

Umbrella sawifiahna hrang hrang zînga pakhat chu 'thil, min

ṭanpui a, min vêngtu' a ni. Umbrella chu Latin ṭawng Umbra aṭanga rawn kal a ni a, a awmzia chu 'hlim' (shadow) tihna a ni. Latin-a a awmze dangah chuan 'Phûng' emaw 'Thlarau/ramhuai' emaw tihna a ni bawk. Occult lehkhabu pakhat Necromonicon-ah chuan Umbra chu thlarau pakhat, sum leh paia malsâwmna thlentu leh, mipat hmeichhiatnaa duhthusam thlentîrtu angin târlan a ni. Umbra chu ramhuai, Setana anga tihlan a ni. Chuvàng chuan, hêng hla thua Umbrella kan hmuh hi, ruah a sur châng a kan khum chhuah thîn Umbrella a ni lo tih kan hriat a pawimawh awm e.

He thu, thui deuh duah tak kan târlanna chhan chu ṭhalai tam tak hi kan hriat lohvin bum kan ni a, kawng dik lo kan zawh tih inhre hauh lovin kawng dik lo kan zawh mêk a ni. Tùnlaina kan tih tam tak hi Kristian Ṭhalaiite tân chuan ûm ve zêl a fuh ber lo. Eng nge i ngaihthlâk thîn a, engin nge i nun kaihruai le?

A tâwpberah chuan, hei hi kan châng wawn ni thei se: "Nangerawh chu engkimah fîmkhur la, hrehawm tuar la, Chanchin Ṭha hriltu lam hna thawk la, i rawngbâwlna kha hlen rawh."



- *I inthlâk danglam thei tawh lo a nih chuan mihring i tling tawh lo tihna a ni.* — Benjamin Franklin
- *Mite hian an thînlungah eng tiata hlu nge i nih tih hi, i thusawi ni lovin, i thiltih aṭang zawkin an teh che a ni.* — Roger W. Babson
- *Hriat ringawt a tâwk lo, i hriat chu atakin hmang rawh. Tum ringawt a sâwt hek lo, a takin ti rawh.* — Johann Wolfgang von Goethe

HRISELNA ■■■■

Lung

Lung lam natna hi naupang leh ðhalaite zîngah aiin upat lamah a awm tam zâwk a ni. A bîk takin mi thau deuh leh meizu mîte leh thisen sâng nei zîngah a ni zual deuh.

Lung lam natna hriat theih dân te:

- * Insawizawi zawhin tháwk a hah a, awm a ti nuam lo va, mutin tháwk chu Asthma vei ang maiin a harsa zual ðhîn.
- * Marphu a chak lovin a rang a, a phút dân pawh a regular lo a ni.
- * Ke báwr vêl a vúng a, chhúnah a vúng zual ðhîn.
- * Awm vêlah na takin a na thut a, a na chu dâr veilam leh bán lamah a kal zèl ðhîn a, chawlh hahdam hnuah a na chu a reh leh thuai ðhîn.
- * Awm vêlah na fík êm êm leh thil in a delsawm vek ta emaw tih mai awl khawpa ná in awm chu a na ðhîn a, a na chu a reh mai lo bawk.

Enkawol dân

- * Lung lam natna hrang hrang

hian enkawl dân hrang hrang an nei a, chuvàngin fímkhur hle tùr a ni. Mi tuemaw in lung lam buaina nei deuhva i hriat chuan damdawi thiamte ràwn vat tùr a ni. Chumi chuan a mamawh hunah a damdawi bîk taka a neih theih chu a pawimawh êm êm a ni.

- * Lung lam buaina nei te chuan lung na chu a chhuah lohna tùr leh a tháwk te a buai lohna tùrin hna a thawk vak tùr a ni lo. Amaherawhchu a hun takah a insawizawi tùr a ni. Hei hian lung ná lo awm thut ðhîn hi a vêng a ni.
- * Lung ðhalo te chuan thil mawm tak an ei tùr a ni lo. An taksa rih dân tùr pangngai aia an rih pheih chuan an intizâng ngei ngei tùr a ni.
- * Tar lamin tháwk harsa an tih a, an kè te a lo vùn bawk chuan, chi al an ei tùr a ni lo. Chi telna an ei rêng rêng tùr a ni lo. An damchúngin chi al lam an ei tlèm tùr a ni.
- * Tupawhin lung na thut emaw angin a pectoris emaw a lo neih thut chuan hmun reh ðha táwk leh vawt nuam takah mut hahdam tîr tùr a ni.

Source : Dawktor awm lohna hmunah pawh



■ *Mi tu pawhin 'míhring nun dân tùr chungchâng' sawi dâwn sela; a nupui fanau leh ðhenawm khawvêng te a en dân te, a ðhian te, a hnuai a thawk te leh a hmêlma te chunga a chét duh dân kan hriat phawt loh chuan ngaihthlâk loh a ðha zâwk...*

— Sydney J.Harris



Hriatzauna

— Joel Lianrinzuala
Mission Vêngthlang Br.

Lemchan thiam Stephen Baldwin hi a hun hmasa lamah chuan nawmchenna lama tlan nasa ve taka ni a. Amah ngeiin, “Ka hun hmasa lamah chuan party-naah ka kal nasa êm êm a, zu ka in nasa a, cocaine ka hnim zawng zawng ringawt pawh kha South America ram tenau deuh mipui zawng zawng hrai ruihna tham a ni hial ang,” tiin a lehkhazu ziah “The Usual Suspect”-ah a sawi nghe nghe.

Hlawhtling takin film tam tak a chang a, a larna leh sum tam tak a hlawh bâkah nawmchenna hmun hmingthang Playboy mansion leh party-na tam takah sâwm a hlawh êm êm reng. “Mak tak tak in ka lo khawsa tawh thîn. Mi tam takin nawmchenna an suangtuah thiam phâk aia thui ka lo kal tawh a. Tûnah chuan Isua Krista ka hriat ták avângin kháng ka thil lo tih tawh zawng zawngte kha chhêm bovin a awm ta vek a ni,” tiin a chanchin a sawi thîn.

Stephen Baldwin hian kum 19 mi a nih laia a tawn, Brazil nula Kenya chu 1990 khân nupuiaha nei a, fanu pahnih Alaia leh Hailey an nei.

An fanu upa zâwk Alaia a pian hian a nupui Kenya chuan Brazil nula Augusta chu awmpui atân

a ruai a. Augusta chuan hnathawh pahin Pathian fakna hla a sa thîn a. Chutiang hla chu eng vanga sa reng nge a nih tih Kenya-i’n a zawh chuan Brazil rama an Kohhranin Baldwin-a te inah hnathawka a awm chuan amah kaltlangin Baldwin-a te chhôngkua chu ringtu lo niin Pathian rawng an la bawl dâwn a ni ti-a an hrilh thuin a chhâng a. Chu thu Kenya-i’n Baldwin-a a hrilh chuan a nuil a za kher mai.

Hun engemaw chen an inchhawr hnu chuan Kenya-i chu a piangthar ta. A pasal hnêna “Zàninah hian ka nun hi Pathian tân ka pe a ni,” tia a hrilh chuan Baldwin-a chuan, “A va mak ve” tiin a chhâng mai a.

Mahse, a nupui piantharna chu Baldwin-a beisei ang a ni ta hauh lo. Nitin Kanya chu zingah thovin bawkkhupin dârkâr hnih chhông a tawngtai ta ziah a. Zànah pawh chutiang tho chuan tawngtaiin minute 45 chhông Bible a chhiar ziah thîn. Baldwin-a chuan a nupui nuna thil danglam lo thleng chu a hmuh hmaih hauh lo.

“A zaidam sawt a, a phunchiar lo sawt bawk a, amahah thil danglam a awm a ni,” tiin thla kaw hnuah chuan a nupui hun hman thîn dân

chu a zâwm ve ta nge nge a. Mahse, September ni 11, 2001-a New York khawpuia World Trade Centre-a chhiatna a thlen hma kha chuan tih tak taka Pathian duhna a nei lèm chuang lo.

A chènna New York ah ngei chhiatna nasa tak a thlen tákah chuan Baldwin-a chu thlarau lamah a tuihál ta takzet a. Chu chhiatna raphthlák tak lo thleng hmang chuan lemchanchiam hlawhtling tak chu Pathianin a ko a, a hlawhtlinna zawng zawng kalsana baptisma changin an Brazilian awmpuinin a lo sawi lâwk tawh ang ngeiin Baldwin-a chuan The Breakthrough Ministry dinin kawng hrang hrangin rawng a bâwl ta a ni. Baldwin-a te chhúngkua hi Hollywood-ah chuan chhúngkaw langsar tak an ni a, a unaute pawh filmstar lâr tak vek an ni.

A unaute ho hian a rinna la ðawmpui ve chiah lo mah se a unaupa Billy-a nupui Chynna Phillips, tûn hmaa hmeichhe zai group lâr tak ðhîn Wilson Phillips member erawhin Baldwin-a te nupa nun lo danglam ta chu a hmuh hmaih hauh lo. Baldwin-a'n Krista tân a nun a hlân tawh tih a hrilh ðum chuan a tûnhma nun a lo hriatchian êm êmin chutiang a sawi chu a nuih a za hial a. Mahse, Baldwin-a te nupa nun inthlâkdanglamzia a hmuh chuan Isua Krista an neih dân chu hriatchian a châk ta tawlh tawlh a.

“Naupang ka nih lai aţangin Isua neih duhna hi ka nei reng tawh ðhîn. Mahse, Isua min duh

dân leh beisei dân angin ka awm thei dân lovin ka inhre tlat a. Hetia Baldwin-a nuna Pathian hnathawh ka hmuh hian hmama Amah ka duh ðhînna kha a lo lang thar leh ta a ni,” tiin Chynna chuan a sawi. 2003 khân Isua hnênah a nun chu a hlân ve thei ta a ni. “Kristian chu mihring sawisèl bo ni tûrah ka lo ngai tlat ðhîn a. Mahse, chutiang chu a lo ni hauh lo. Isuan keimahah Amah tihlan a duh zâwk a lo ni,” a ti bawk.

Stephen Baldwin-a chuan “Pathian thua chuan mi zawng zawng hian thutak hre tûrin hun remchâng an nei ðheuh a. Mahse thutak duh lo tute chuan chatuan nunna an nei ve lo ang. Ka thusawi hi Spephen Baldwin-a ngaih dân a ni lo, Pathian thu in a sawi dân zâwk a ni. Kei chu he leia a thu lo puangtu mai ka ni” tiin a sawi ðhîn a ni.

A nun a lo danglam ta chu a eizawanna hmun Hollywood nèn chuan a inmil thei ta hauh lo tung. Film siamtute'n an film-a chang tûrin la sâwm reng ðhîn mah se, a rinna a phatsan theihloh avângin an inrem thei tlat tawh lo. A chhan chu tûnhmaa a lo chan tawh ðhîn dân - ðawngkam bawlhhlawh tak tak hman te, tharum thawhna râpthlák tak tak lantîr te, mipat hmeichhiatna ngialngan taka tihlan te a tih theih tawh loh vâng a ni. Tûn hmaa a film chan tam tak chu tûnah chang ðha leh dân ta se, a chan nawn duh hauh tawh loh tûr thu a sawi ðhîn ♦



KANTU

Sihfa Br. & Sateek Br.

SIHFA BRANCH

January ni 6, 2004 a Golden Jubilee lâwm tawh, kumin a Branch kumpuan a 'Rinawmna' hmang mék, Sihfa Pastor Bial a Bial Station, Sihfa Branch KṚP ah hian kuminah member 170 an awm a. Group hnih, Isaia leh Amosa Group neiin kumina an budget ₹ 10,000 an tlák ve ve tawh a ni. Kumina an Branch Budget chu ₹ 96,000 a ni.

Sub-Committee pali : Evangelical Cell, Finance, Decoration, Refreshment an nei a, kum 1985 aṭangin Ṭhalai Æng chanchinbu chhuahin kum 4 vèl chàwlin 2006 aṭang khân Ebenezer tia hming-thlákin chhuah chhunzawm a ni. Kristian Ṭhalai Chanchinbu hi copy 50 an la méka, bu khat hi member 3.4 in inchhiartáwm ang an ni.

Thawhṭan zànah chawhrualin nikum khân member 35 (21.82%) inkhâwm ṭhîn ang an ni a, sermon leh kumpuan zirho leh special programme a hman ṭhîn a ni. Pathianni tlaiah ṭawngṭairual, short sermon, hla zir, rilru sawi te hmangin an inkhâwm ṭhîn. Kohhran inkhâwm a inkhâwm kim an inchhiar ṭhîn a, a inkhâwm tam te hnènah làwmmann pein

inkhâwm kawngah hma sâwn phah hlein an inhria a ni.

Missionary 2½ an chàwm mék a, thla tin thawhṭan zàn inkhâwm hmasa berah Ramthar pual sermon neih ṭhîn a ni a, hemi zàn hian Missionary puala thilpèk lákkhâwm ṭhîn a ni. Faith Promise pawh Missionary chàwmna atân hman a ni. An member aṭangin Pastor pakhat an chhuak tawh a, Missionary Training College-ah Training lai mi 2 an nei mék.

Zaipâwl rawngbàwlna nung takin an kalpui ṭhîn a, Pathianni zantin Hla rem ṭhîn a ni. DDK Aizâwlah hla 4 an thun tawh a ni. Branch dang tlawhin ṭum 4 an fehchhuak tawh a, Branch dang 7 in an tlawh tawh bawk. Sihfa Branch aṭang hian Sihfa North Branch a ding tawh bawk a ni.

Biak In hawnga innei hi hmundanga innei aiin an tam ziah a. Biak In hawnga innei te chu ropui takin an làwm ṭhîn. Evangelical Cell hmalákna in Pathianni tlaiah ṭawngṭaina an hmang ziah ṭhîn a, a chángin Kohhran intinah ṭawngṭaina an hmang ṭhîn bawk. Tin, Branch Committee member te hian thawhṭan zàn inkhâwm bànah memberte tân ṭawngṭaina an nei ziah ṭhîn a ni ♦

SATEEK BRANCH

Ristian Thalai Pâwl, Sateek Branch hi kum 1955 khân Zosap Missionary Rev.Owen-a hova din a ni a. Kumin hian member 208 (Mipa - 135, Hmeichhia - 73) an awm mék a ni. 2011 hian Branch hnuaiiah Sub-Committee hrang hrang Programme, Literature, Evangelism, Music, Property Sub-Committee-te an nei a. KṚP Inkhâwm leh Kohhran Inkhâwm bàn apiangin ṭawngṭai rualna an nei ṭhîn a. Thawṭan zàn Inkhâwm hi Sermon, Short-Sermon, Thupui zirho leh Sharing tea hun hman ṭhîn a ni. Nikum khân thawṭan zàn Inkhâwm hi chawhrualin 26% vél a ni.

Pathianni tlaiah Fellowship an nei ṭhîn a, hla zir, ṭawngṭai rual, zaiho, Bible quiz-te leh sharing te a hun hman ṭhîn a ni. Missionary-te tân thawhlâwm lakkhâwm ṭhîn a ni bawk. Kohhran mi chhiat táwk (mitthi) an awmin an chhiattawh aṭanga Pathianni zîngkâr remchâng hmasa berah Branch pumhuapin Inkhâwm pui ṭhîn a ni. KṚP Member boral an awmin râlana thilpêk hlan ṭhîn a ni bawk. KṚP Member Biak In hawnga Nupui/Pasal nei an awmin hla remsak ṭhîn an nih bákah lawmpuina thuziak (Citation) hlan ṭhîn an ni. Kumin-

hian Group hrang hrang pali - Matthaia, Marka, Luka, Johana Group-ah an inṭhen a, group-te hi kum chanve Jan-June, July-December atân budget siamsak an ni a, group-te hi branch tichaktu pawimawh tak an ni. Kohhran Zaipâwl nei ṭhîn in a duh apiang tel theih a ni. Kohhran leh KṚP hun pawimawhah te zai ṭhîn a ni. Kohhran Zaipâwl hian Doordarshan Kendra Aizâwl-ah hla pali an thun tawh a ni.

An sum tuak dân tlángpui chu faith promise, lei laia inhlawh, sawhthing chawh leh lin, group budget leh electric bill commission te a ni. Kum 1989 aṭangin Bethel chanchinbu (Pathianni chhuak) an chhuah ṭan a, Kohhran leh KṚP tân a ṭangkai hle. Tûnah hian Missionary pahnih an châwm mék a, KṚP Member aṭangin Pastor pahnih leh Missionary paruk an chhuak tawh a ni.

Kumin 2011 KṚP Day pual khân Presbyterian Hospital Durtlâng-ah Thisen Unit 22 an pék bákah khawchhûnga miharsate hnênah ṭanpuina pawisa fai an pe a ni. Kumin hian Branch Project atân Biak In ṭhutthleng cushion-a phah chhuah vek tum a ni. Central KṚP Chanchinbu Kristian Thalai hi copy 40 an la mék a, copy khat hi member 5.2 in inchhiartâwm ṭhîn ang an ni♦

Keimahni



- May ni 14-15, 2011 khân Bîlkhawthlîr Bial KṬP in Kualmâwi Kohhran Biak Inah Bial huap Leadership Training an nei a, Tual Upa Zohtagzuala Chhangte leh Pu R. Lalhmingthanga, C/M ten an hmanpui. Training-ah hian mi 30 an tel a, hruaitu kalte hian Pathian Biak Inkhâwmah Pathian thuchah ʔum 2 sawiin fellow-ship-ah ʔum 2 an sawi bawk.
- May ni 14-15, 2011 chhûng vèk khân Bîlkhawthlîr Hmârvêng Bial chuan Tuiṭha Vêng Kohhran Biak Inah Bial huap Retreat an nei a, inrinni nilêngin retreat programme hman a ni a, hetah hian mi 50 an tel a ni. He hun hmanpui hian Tual Upa Dr. Samuel Vànalthlanga leh Tual Upa Lalhruaizèla, C/M te an kal a, inrinni zàn aṭanga Pathianni zàn thleng Kohhranin hun pein thuchah ʔum 4 sawiin Cental KṬP report an pe bawk a ni.
- May ni 20-22, 2011 khân Dârlàwn Bial huap KṬP Leadership Training, Sâwleng Kohhran Biak Inah neih a ni a, training-ah hian mi 78 an tel a. He hun hmanpui hian Tual Upa Lalramdina Râlte leh Tv. Vànalhruaia, C/M-te an kal a, Pathian Biak Inkhâwmah thuchah ʔum 3 an sawi bawk a ni.
- May ni 20-22, 2011 khân Lallen Bial huap KṬP Leadership Training, Lallen Kohhran Biak Inah neih a ni a, training-ah hian mi 41 an tel. He hun hmanpui hian Tual Upa Dr. C. Zârzoliana, Asst. Secretary leh Tv. V.L. Muanchhana, C/M-te an kal. Training bâkah hian Kohhran Pathian Biak Inkhâwmah thuchah ʔum 4 an sawi a. Thawhṭanni-ah Aizâwl panin an lo chho a, Tut bula leimin in a dan avàngin Lallen-ah lét lehin thawhṭan zàn an hman a, thawhlejni-ah an motor ken hnutchhiahin Sumo inbànlet hmangin an lo hâwng a ni.
- May ni 24, 2011 (Thawhlejni) zàn dâr 7:00 khân Central KṬP hruaituten kumina kan Rorèl Inkhâwm thurèl bawhzuina pakhat atân HIV/AIDS zirhona Upper Republic Kohhran Committee room-ah neih a ni. He hun min hmanpui tùr hian SHALOM sàwm

an ni a, sawihona hun tha tak hman a ni bawk. HIV/AIDS darh zêl tùr vènna kawnga hmalâkna atân he programme hi thil ùngkai tak a nih kan beisei a ni. A thlengtu Kohhranin hneh taka min lo thlengin Ei & In lam pawh an tum vek a, SHALOM leh Upper Republic Kohhran chungah Central KṚP chuan làwmthu a sawi a ni.

■ May ni 26-29, 2011 khân E. Lungdâr Bial KṚP Solfa Training leh Leadership Training, Lêng Kohhran Biak In-ah neih a, training-ah hian mi 75 zet an tel thei a ni. He hun hmanpui hian Upa Lalrinmuana, General Secretary leh Pu Lalthanmawia, C/M-te an kal a, Kohhran Pathian Biak Inkhâwmah thuchah ùm 3 an sawi bawk.

■ June ni 2-3, 2011 khân Silchar Mizo Bial KṚP Leadership Training Silchar Mission Compound-ah neih a ni a, training-ah hian mi 30 an tel. He hun hmanpui hian Pu Lalmuanawma, Treasurer leh Pu Vânlalfinga, Finance Secretary te an kal a ni.

■ **Tual Upa atân thlang :** A hnuai a kan tàrlan Central KṚP hruiute hi an awmna Kohhranah Tual Upa atân thlan an ni.

HMING	THLAN NI	AWMNA KOHHRAN
-------	----------	---------------

- | | | |
|-----------------------------|-----------------|------------------|
| 1. Pu Lalramdina Râlte | May ni 15, 2011 | Armed Vêng North |
| 2. Pu Lalhruaizêla | May ni 22, 2011 | Ramhlun North |
| 3. Dr. Samuel Vânlalthlanga | May ni 22, 2011 | Luangmual West |
- Kan hruiute Tual Upa atâna thlan tharte kan lawmpui a, an rawngbâwl zél na atân duhsakna kan hlân e.

■ Kum 2011 KṚP Rorèl Inkhâwmin *Bial KṚP Hruaitute training neihpui ni se* tia a rèl chu Central Committee chuan bawhzuiin training neih dàn tùr a hnuai a mi ang hian ruahmanna a siam.

THAWH KHATNA : July ni 30, 2011 (Inrinni)-ah Ramhlun Kohhran, Aizâwl-ah neih a ni ang a, Bial 28 aṅanga Office Bearer te leh Central KṚP hruiute an tel ang.

THAWH HNIHNA : August ni 5, 2011 (Zirtâwpni)-ah hmun 9-ah neih a ni ang a, training neihpui tùrin Central KṚP hruiute an chhuak ang. Training neihna tùr Kohhran leh Bial tel zât - Aibâwk (20), Lunglei Vênglai (18), Sêrchhîp Kâwnpui (17), Saitual (12), Kolasib Diakkâwn (18), Dârlâwn (8), Rawpuichhîp (20), Khawzâwl Vêngthar (8), Champhai Bethel (15).

Training-ah hian Bial tin Office Bearer-te kim taka kal tùrin kan inbeisei a, training tuang tak leh hlâwk tak neih anih theih nân Pathian hnênah i dil ang u.

DECLARATION


Form I

(See Rule 3)

1. Title of the Newspaper : Kristian Thalai
2. Language in which it is published : Mizo
3. Periodicity of its publication : Monthly
4. Printer's Name : Lalrinmuana
5. Nationality : Indian
6. Publisher's Name : Lalrinmuana
Whether Citizen of India : Yes
Address : Mizoram
7. Editor's Name : Lalmuanpuia
8. Owner's Name : Kristian Thalai Fellowship
Whether Printing is conducted : Mission Veng
and premises on which the : P O Aizawl
Press is install : Mizoram
9. Name and Address of individual : Nil
who own the newspaper and
partners or share holders holding
more than one percent of the
total capital

I, Lalrinmuana, hereby declare that the particulars given above are true to the best of my knowledge and belief.

Dated Aizawl
the 1st July, 2011


Lalrinmuana
Signature of Publisher

(Keimahni chhunzawmna...)

■ May ni 20, 2011 (Zirtawpni) chawhnu dâr 1:00 khân Zohmangaiha, Committee Member, CKTP chuan Khatla South Kohhran Biak In-ah nupui atan Zoremsiami d/o C. Pazâwna, Khatla South chu a nei ta. Nupa tuak tharte kan lawmpui a, duhsakna kan hlân e.



Bilkhawthlir Bial Leadership training neihpua kal Pu Zotea, Pu Thanga leh NI Melody (Soloist) leh training-a telte



E Lungdar Bial Leadership training leh Sofa training hmanpuin Pu Rinmuana leh Pu Thanmawia, training-a telte nen



Bilkhawthlir Hmarveng Bial Retreat retreat neihpua kal Pu Samuela leh Pu Hruaizela, training-a telte



Silchar Mizo Bial KP Leadership Training hmanpuin Pu Finga leh Pu Muanawma, training-a telte nen



Darlawn Bial Leadership hmanpuia kal Pu Hruaitea leh Pu Ramdina, training-a telte nen



Kantu - Sihfa Branch



Lallen Bial Leadership hmanpuia kal Pu Zara leh Tv Muanchhana, training-a telte nen



Kantu - Sateek Branch



CKTP Hruaitu
CHANCHIN
Pu Lalrohlua
Phek 19